



温州市图书馆

WENZHOU LIBRARY



温州市图书馆

WENZHOU LIBRARY

增編金石例補緣起

不才少志不樂科舉程度之文憲漢魏而下駢麗瑰
奇之著憶昔友人孫壽之授吾靈芬館初稟一冊辭
富而味腴讀之盡漏徧之以墨規注所問難者凡數
十牋明日壽之來粵貽將去以示靈芬遂呼之爲小
友旣而出門惘惘各走四方合并無繇音塵迴絕而
壽之又下世歲時忽忽逾廿稔但聞江淮間多郭翁
之名誦郭翁之詩文翕翕然若碑之於口也然其軫
迹則久莫可知也壬辰春吾客淞西兵備掌文書暇

日於會城識虞子綱文綱文素以才氣行其鄉鄉之人皆目爲狂而頗與吾譚於靈芬又下之嘗言近時江南北浙東西之文可碑版千秋者微此翁其誰歸厥集旣成而此身俱化亦幸矣歎嗚呼吾于是知靈芬旣實亟求其全集讀之迺趨然熹怒然悲如對故人三十年前而不圖其文福如是饑驅弗已一旦以千金之寶竟還諸太空也雖然子厚有云歿者其糟粕不歿者其精英吾正不必爲靈芬悲而轉悲吾友人孫壽之之不及見斯文也且吾自有所以悲吾也時

編金石文例擗之版因節取集中例補二卷增元明
 國初三先生後若謂其於金石文字之學直可繼三
 家而並稱之爾用書緣起請質諸海內之知靈芬者
 時道光十有三年立春日書於薩達摩芬陀麗精舍
 抱疴既久凡讐校事命吾子辛生參之擗版之工閱
 百二十日而畢同郡李瑤并記



金石例補序

金石之有例自潘景梁始其括例止取韓柳二家明
王止仲推而廣之以唐宋十五家之文爲準而斷以
已意 本朝黃梨洲爲金石要例補潘氏之闕其言
體要亦備是已朱錫鬯檢討嘗言碑誌始於東漢欲
取洪氏隸釋隸續臚列其體制以補三家之例而未
及爲磨質性禱昧問學荒落然竊嘗有意於碑版之
文以爲泥於例則官府吏胥之文移也不知例則鄉
農邨學究之論說也顧旣以爲有例則必從其朔東

漢其鼻祖矣輒不自揆取洪氏之書爲之條分而縷
析之間以後人祖述之繇附識於後魏晉六朝上承
漢氏而下啓唐人者也其有可采亦著於篇而唐人
不及焉爲金石例補二卷插架寡陋遺漏疏畧所在
多有幸同志有以正之助之云爾嘉慶十有六年六
月二十有七日吳江郭麐祥伯甫序

金石例補序


東里生問於頻伽子曰碑碣之盛其漢氏之東歟其體以鋪陳終始爲能六朝唐初人因之自昌黎韓氏出而體變歐陽王曾韓之別子也其法胥準于太史公書循一端論全體與初製大殊焉後有作者亦規其初製歟頻伽子曰吾聞諸李氏習之之論行狀矣曰世之作行狀者或虛加美辭曾不直叙其事善惡混然不可明若使指事書實不飾虛言則必有人知其真僞不然者彼習之之言非有見於文字之極弊

歟蓋古時風氣淳樸其見於讚頌無諛辭故出其文
昭然共信其言之實而作者恆不署名於其間文字
漸繁遂有以文字售其欺者唯言出于有道德之人
始傳信焉又其言非有實指其體終不能遠於流俗
昌黎歐陽王曾之文所謂指事書實者也于是而必
規其初體得毋蹈習之之所譏歟夫著述之事因時
而遷屢變則又從其朔說經者之反乎鄭虞也論詩
者之反乎蕭選也皆從其朔也而碑碣有不能非事
會使然歟雖然可變者辭而不可變者修辭之例也

說經殊而訓詁不殊論詩殊而安章宅句不殊又豈
特碑碣然哉彼循其變而昧其初之例其失固惟固
斯陋吾病夫固陋者之託於韓歐陽王曾之文而不
能自擴也又病夫規韓歐陽王曾之文而言不實亦
不足傳信也時頻伽撰金石例補甫成東里生因敘
次其言以爲後序嘉慶十有八年七月朔後二日仁
和汪家禧撰

味玉象象題

天子將其地者唯言出子有



其其育以爲發有稟慶十有八幸江且機發二日口

不其粉許也祖龍而對金不國蘇州與東望里因絲

自自龜出又漁夫賦韓烟則王會之文而青不實亦

視到晉漢夫固國香文持依韓烟則王會之文而不

莽軀蘇然婦好爵其變而却其味之國其夫固辨固

錯跡怒而階端不凝歸情殺而安章字向不凝又豈

金石例補目錄

卷一

序先世例

書遠祖不書三代例

書遠祖三代不書名例

書遠祖及父不書祖父例

書祖父官位不書名例

書某人孫例

書祖考兼書從父例

書祖父兼書兄例

書高曾祖父名字官位例

書祖父術業例

書父不書祖父例

書祖父及世父叔父例

書父叔父及弟若子例

不書祖父書某人弟例

書高曾祖父變例

三代皆書字及夫人例



書子女例

書翁及子名字官位存沒例

書子名及官位例

諸子不悉書例

書妻子女及壻變例

書夫人例

書祔葬例

備書兄弟例

書卒年月日例

書卒年月日變例

書年壽卒葬日例

書卒官例

卷二

不書名書字例

書立碑人例

子爲父立碑例

孫爲祖立碑例

妻弟立碑書名例

舅之孫立碑書名例

弟及子作碑書名例

同官作銘書名例

書制銘人例

弟銘兄例

書造碑人例

書居憂例

書賜弔贈官賜諡例

碑題書郡邑例



書私諡例

碣題官位例

附書他人例

一碑二人作例

頌後有序有亂有詩例

墓碑有亂例

書助葬人例

壽藏銘例

書童子例

書故民例

書遷葬例

婦人碑誌書夫官位及姓氏例

婦人墓誌以夫姓冠氏上例

諸王不書姓例

誄序用韻不用韻例

穿中有記例

碑前列上書制詔例

碑後列制詔例

應詔作銘書年月例

書奉敕例

書作文變例

紀功碑書其人三代例

金石例補卷一

吳江 郭馨 祥伯

序先世例

漢國三老袁良碑君諱良字厚卿陳國扶樂人也厥
先舜苗世爲封君周之興虞闕父典陶正嗣滿爲陳
侯至元孫濤塗初氏父字立姓曰袁魯僖公四年爲
大夫哀十一年頗作司徒其末或適齊楚而袁生闕
獨留陳當秦之亂隱居河雒高祖破項實從其冊天
下旣定還宅扶樂孝武征和三年曾孫幹斬賊公先

勇拜黃門郎封關內侯食遺鄉六百戶後錫金紫遷
脩城之鄰幹薨子經嗣經薨子山嗣傳國三世至王
莽而絕君卽山之曾孫

按此碑序袁良得姓受封傳爵國除凡一百六十
餘言而世次勛業瞭然在目最爲可法昌黎諸碑
表皆本於此不及其祖若父者勛爵無可紀故畧
之也

漢敦煌長史武班碑武君諱班字宣張昔殷王武丁
久伐鬼方元功章炳勲藏王府官族分析因以爲氏

焉武氏蓋其後也商周遐邇歷世壙遠不隕其美漢興以來爵位相踵

按此序其得姓之始而世次畧之

書遠祖不書三代例

漢泰山都尉孔宙碑君諱宙字季將孔子十九世之孫也

此特書聖裔尊聖也世次不書畧也

書遠祖三代不書名例

晉右將軍鄭烈碑遠祖以亢節著德揚光漢氏之初

近葉以儒術博古顯名中興之後逮至曾祖先生皇
祖徵君蹈明哲之高尙嘉肥遂而不悶顯考將作大
匠實有茂德載在國策

按漢人碑文其述先世多不著其名此碑遠祖卽
鄭君不肯名籍者所謂亢節著德也

書遠祖及父不書祖父例

漢孔謙碣孔謙字德讓者宣尼公廿世孫都尉君之
子也孔彪碑亦然

按書宣尼尊聖也不書祖畧也

書祖父官位不書名例

漢郎中王政碑君諱政字季醜漢中太守之孫從事掾之第三子也

漢封邱令王元賓碑君諱闕字元賓御史君之孫茂材君之子也

書某人孫例

漢司隸校尉楊淮碑大司隸孟文之元孫也

按二王君碑皆著其祖父之官而不著其名楊淮碑止著其祖後人志墓之文或止稱其顯聞於時

者祖此例也其王政碑曰第幾子又一例也隸續云凡稱元妃元子元兄元舅之類皆以長言之二楊俱曰元孫猶元士然以元爲美稱也按楊淮碑兼及其弟故洪氏云然費鳳碑又有元弟亦美稱也

書祖考兼書從父例

漢平都相蔣君碑君之祖考闕爲交州刺史從父交州太守闕能輸力王室以篤臣節功列天府令聞不

已

書祖父兼書兄例

漢淳于長夏承碑君諱承字仲充東萊府君之孫太尉掾之中子右中郎將弟也

書高曾祖父名字官位例

漢綏民校尉熊君碑君高祖父籌自汝南吳闕子靈

王元孫大漢龍興闕舉鄉闕拜議郎南巡郡國封龍

平闕祖父旻闕舉闕大司馬郊隧闕曾祖父範督郵

守長州辟元闕君闕應上計闕祖父師闕上計掾君

闕喬字漢舉更督郵主簿五官

按隸釋云漢人敘先世但云某君之孫某君之子
既不名其父祖亦不著其德美此碑獨異於他刻
高曾之間又有祖父旻其上闕文蓋伯叔祖也祖
之下云君喬字漢舉喬上亦闕一字必父也愚謂
漢人立碑皆門生故吏士民頌功德之詞意在其
人之事迹不必詳其先業非若後世埋銘神道碑
之文也然唐人銘誌亦不必盡詳視其可紀與否
耳末流諛墓遂非此不足以爲悅矣亦文章升降
之會也

書祖父術業例

漢鄒令景君闕銘君治歐陽尙書傳祖父河南尹父
步兵校尉業門徒上錄三千餘人明明側陋遠近照
聞

漢衛尉衡方碑君之烈祖少以儒術安貧樂道履該
顏原兼修季由聞斯行諸砥仁礪闕土堦夷愍之貢
經常伯之寮位左馮翊先帝所尊垂名竹帛考廬江
太守兄雁門太守長發其祥

書父不書祖父例

漢郎中鄭固碑君諱固字伯堅著君元子也

漢孝廉柳敏碑君父以孝廉除郎中闕部府丞

書祖父及世父叔父例

漢議郎元賓碑魯相之孫成德闕東安平令北海相

闕守之弟子中牟令兄子也

書父叔父及弟若子例

漢安平相孫根碑府君諱根字元石司空公之伯子
樂安太守之兄子漢陽太守侍御史之兄乘氏令之

考

按書其子而曰某之考亦蒙上文遣辭不得不爾
非有例也

不書祖父書某人弟例

漢金鄉長侯成碑君則上黨太守之弟

書高曾祖父變例

漢尹宙碑君東平相之元會稽太守之曾富波侯相
之孫守長社令之元子

按漢碑敘其先世多曰某人曾孫某人孫某人子
如楊淮碑已見及屬國侯李翊碑君諱翊字輔國

牂柯太守曾孫謁者孫從事君之元子是也此碑
稱元曾而去孫字亦叛例也

三代皆書字及夫人例

北魏刁遵墓誌高祖協元亮 某官 夫人彭城曹氏父

義 某官 曾祖彝太倫 某官 夫人闕 父 雍淑和 某官 夫

人琅邪王氏父 闕

按漢人書其祖父止有官闕而不書名從未有及
其配者此則既著高曾祖父之官位與名而并著
其字既書其夫人而又著其夫人之父可謂詳矣

此亦世變文繇之一驗也惟遵之夫人與其父高
允別書於銘詞之後則爲無體潛研堂金石跋尾
以爲墓志之變例然不可從也

書子女例

漢孫叔敖碑陰相君有三子長子卽封食邑固始少
子在江陵中子居三闕又世伯子字子仲治產於續
虛有六男一女大子字長都次子蘭卿次弟字仲陽
次弟字叔通次弟字衛公次弟字劉卿此續宗六父
也孝伯子字文闕亦不仕學治產於材虛亦有六男

一女太子字惠明次弟字次卿次弟字聖公次弟字
稚卿次弟字彥卿次弟字少都此材宗六父也

按此列孫氏宗族於碑陰序次特詳然皆字而不
名又以長子爲大子次子以下蒙其兄而稱弟此
亦當時偶成之體可備一例也

書弟及子名字官位存沒例

漢綏民校尉熊君碑君同產弟望季公質性忼慨史
魚之直吏功曹列掾督郵都梁長早終君長子再孝
存姿操敦良耽志好學博覽雅藝闕三奏辟召于州

終

書子名及官位例

漢梁相費汎碑二子纂闕鳳由宰府至堂邑令政九
江太守

諸子不悉書例

北魏刁遵墓誌小子整等泣徂年之箭駿痛龜筮之
告祥

潛研堂金石跋尾云遵有子十三人誌惟云小子
整等不及諸昆弟之名蓋遵沒時整兄楷尙均已

先卒古人文字之質而簡如此而諸弟姪不以不
列名爲嫌又徵古風之淳厚也按少詹殆有嘸於
流俗乞志墓者以不備書其子姓爲不樂故爲此
論攷之漢人表志皆不盡書其後嗣之名也

書妻子子女及壻變例

北魏故懷令李君墓誌銘妻恒農楊氏父談爲郟州
主簿息女孟宜年卅六適恒農王始儁郡中正息女
媛姿適遼西常彪侍御史息女仲妃適武威賈子謐
涼州治中息道沖息女婉華息女休顏息女四輝息

道逸年十六息道棲年十三

按中州金石志此數行皆在銘詞之後與刁遵誌書妻及妻父於後相同而子女錯雜書者當以年齒爲後先也女作息女子作息各著其年而女之夫各著其官亦後世誌銘之濫觴也

書夫人例

漢金鄉長侯成碑夫人以延熹七年歲在甲辰十一

月三日庚午遭疾終

末一行

漢郎中馬江碑夫人宛句曹氏終溫淑慎咸曰女師

年五十五建寧三年十二月卒

按漢碑無書配者其書夫人皆已卒蓋祔葬於兆故及之也又夏堪碑娉會謝氏并靈合柩則合葬而書也

書祔葬例

漢郎中鄭固碑先是君大男孟子有楊烏之才善性形於歧嶷闕見於垂髦年七歲而夭大君夫人所共哀也故建闕共墳配食斯壇以慰考妣之心又其辭曰嗟嗟孟子苗而弗毓奉我元兄修孝罔極魂而有

靈亦歆斯勒

漢郎中馬江碑君中弟字文緒位主簿督郵志行闕
期落落自有大節年卅二早世短折

按鄭碑當是其弟爲之而以鄭君之子祔葬所謂
共墳配食奉我元兄也馬碑隸釋以爲當是因夫
人卜兆以馬君共塋又同時改厝其季故作碑并
言之夫人已見前書夫人例中

備書兄弟例

漢北軍中候郭仲奇碑君惠兄竹邑侯相次尙書侍

郎次濟北相順翁臨沂長次徐州刺史次中山相次
雒城令咸以孝廉公府茂選貞亮皦白翼翼瑛彥配
周之八爲國楨幹又聞兄疾病率爾逝將念妨第路
遜位恬榮

按此碑先書元城君之第四子後敘自周以來至
漢家世而於三兄四弟備載官位一以見其門伐
之盛一以見郭君友于之篤昌黎李虛中墓志詳
書其兄事柳州楊憑等誌銘正似此也

書卒年月日例

漢謁者景君墓表維元初元年五月丁卯故謁者任
城景君卒

漢郎中王政碑脩仁不闕卒從氛暴以元嘉三年春
正月戊寅闕旣沒而否

漢平輿令薛君碑惟延熹六年春三月平輿令薛君
卒烏虜哀哉吏民其咨咨君之德迺建碑石于墓之
側

按景君薛君兩碑皆先書卒之年月日於前及敘
立碑頌德之意隸續所云薛君碑前有序凡三十

六字是也王政碑則卒年月日書於中隸釋曰東
都自路都尉始見墓闕蓋表阡銘壙之濫觴也有
文而傳於今則自景君始

書卒年月日變例

漢嚴訢碑惟漢中興卯金休烈河平元年歲治東宮
星屬角房月建朱鳥中呂之均萬物慈躬華實青蔥
岐行蠕動咸守厥常人物同授獨遭災霜顛隕徂落
壽不寬宏經說三命君獲其央年六十有九禮勝蚤
夭咨嗟痛兮嗚呼悲傷故著名誅噲嘆歔歔發憤援

筆舒虛曠喟其辭曰云云

隸續以爲庚寅四月又云漢人銘墓皆一律此文
先書其所終歲月及壽考踰百言始云伊歎嚴君
諱訢字少通遂述其行事與費鳳兩碑畧同

漢外黃令高君碑光和七年龍在困敦月次鶉火六
日丙申卒

按兩碑所紀歲月皆不直書椰子厚伯祖妣李夫
人墓誌銘云藹其芳壽且康大梁鶉火沈幽光用
此例

書年壽卒葬日例

漢平都相蔣君碑闕天不弔降災賢良闕六十有五

元嘉二年三月甲午卒

漢郎中鄭固碑乃遘凶愍年卅二其四月廿四日遭命隕身痛如之何

漢議郎元賓碑年卅八延熹二年二月闕卒

漢中常侍樊安碑年五十有六以永壽四年二月甲辰卒

漢冀州從事張表碑春秋六十有四以建寧元年三

月癸闕薨疾而終其年十有一月丙寅克葬

按漢碑或止書卒或書卒之年月而不書其年壽其書年壽者皆在卒年月日之上其例如右卒例止日而不時近俗爲行述輒書某時非古也張表碑兼書葬日又司徒掾梁休碑亦有二月戊寅卜葬之文蓋綦備矣

書卒官例

漢平都相蔣君碑六十有五元嘉二年三月甲午卒遭疾不豫闕卒於官

漢益州太守高願碑建安十四年八月於官卒

金石例補卷二

吳江 郭麐 祥伯

不書名書字例

漢故民吳仲山碑熹平元年十二月上旬吳公仲山少立名節約身剛已隸釋云碑無其名仲山其字也按此州縣民人所立不名亦尊愛之也

書立碑人例

漢謁者景君墓表碑陰有諸生服義者十五人隸釋以爲卽立碑之人也

漢郊令景君闕銘諸生服義百有餘人迺刻此石

漢北海相景君銘於是故吏門生相與論曰

漢議郎元賓碑於是族舊門人莫不傷瘁立銘以詠
君德

漢郎中王政碑於是門徒士夫闕君咸有闕乃相與
立石表行以闕後

漢平輿令薛君碑吏民其咨咨君之德乃建碑石於
墓之側

按以上皆門生故吏戚族所立故碑止言其立石

之意而不著其名或有碑陰者卽詳列其爵里名
字他皆類此椰子厚殿中侍御史柳公墓表云凡
我所知哀痛無極又云故友諸生宗人外姻號慟
會葬又云於是汝南周公巢等相與琢石書德用
圖不朽皆祖述漢碑例也

子爲父立碑例

漢中常侍樊安碑嗣子遷實以幼弱夙敘王爵而器
所天禮備復位以延熹二年冬十有一月自上烝祭
乃尋惟烈考恭修之懿勒之碑石俾不失隧

漢司隸校尉魯峻碑息叡不才弱冠而孤承堂弗構
析薪弗荷

按金石萃編云子爲文棐石以述其父漢碑中創
例愚謂此瀧岡阡表之所放也

孫爲祖立碑例

漢梁相費汎碑適孫玠感奚斯之義刊銘元石旌勒
厥美

按隸釋以爲此碑其孫所立故其銘有穆穆顯祖
之文

漢國三老袁良碑於是厥孫衛尉滂司徒掾宏闕乃
刊石作銘

漢從事武梁碑孝子仲章季章季立孝孫子儵躬修
子道竭家所有選擇名石南山之陽擢取妙好色無
斑黃前設壇坦後建祠堂良匠衛改雕文刻書羅列
成行攄騁伎巧委虵有章垂示後嗣萬世不忘

按此皆子孫銘其祖考其自述如此隸釋以爲武
梁碑兼列良匠之名與鄱閣頌列石師孔耽神祠
碑所列治師名同後世署刻石者姓名實始此矣

妻弟立碑書名例

漢堂邑令費鳳碑惟熹平六年歲絡於大荒无射之
月堂邑令費君寢疾卒烏乎哀哉於是夫人元弟故
闕守卜允追而誄之

舅之孫立碑書名例

費鳳別刻

金石錄
作碑

君舅家中孫甘陵石勳字子才載

馳載驅奔於罍庭肝確意悲感切傷心瞻彼碑誄懷
之好音司馬慕藺相南容復白圭仰之以彌高鑽之
而彌堅不堪哀且思敘詩之一篇庶幾昔子夏起夫

子之所言

按以上二碑前碑妻弟卜君所作後碑舅之中孫
石勳所作兩碑文皆五言後碑所云瞻彼碑誄懷
之好音謂卜君碑也此又與張公神祠碑同例柳
子厚房公碑陰杜牧之韓文公孔子碑陰意皆同
此

弟及子作碑書名例

漢純令劉修碑二弟龍純孿哀孔懷孤生儁協邵長
號思慕立此碑銘以表景行

同官作銘書名例

漢敦煌長史武班碑於是金鄉長河間高陽史恢等
追惟昔日同歲郎署云云故闕石銘碑以旌遺德焉
漢孝廉柳敏碑堂無文麗墓無碑識建寧元年縣長
同歲樵爲屬國趙臺公憤然念素帛之義其二年十
月甲子爲君立碑傳於萬基因勒銘歎之

按前碑云同歲隸釋以爲同年爲僚也後碑同歲
蓋謂同年被徵也又云漢碑多門生故吏所立至
於同歲爲之者唯此二碑一歿一生而寮友之好

不變如此愚謂後世銘誌之文多有述交際愛厚之情者蓋本於此

書制銘人例

北魏陸希道銘側題字前涼州刺史兼吏部郎中陳郡袁翻字景翔制銘

按孟縣志此條不係銘詞之前後在誌之側面別刻一行又云魏碑誌皆不著撰人名字此獨并著其字者殆因翻有大名愛而重之故書以爲光美耳愚謂好名之心後世益甚漢人有書作銘頌之

人者卽其立石之人自表慕仰之意也此字不知
其子孫刻之抑袁君自喜而署之要之開後人譏
文書丹之漸矣

弟銘兄例

漢郎中鄭固碑琦瑤延以爲至德不紀則鍾鼎奚銘
昔姬闕武弟述其兄綜闕行於茂陋獨曷敢忘乃刊
石以旌遺芳

按此碑詳味其語琦瑤當是鄭君之弟昔姬以下
闕二字當是旦頌言周公能述武王也漢人遣詞

無所拘忌大都如此

書造碑人例

漢巴郡太守樊敏碑建安十年三月上旬造石工劉
盛息懍書

按漢碑或書某年月日造或書立其郿閣頌書石
師孔耽碑書治師武梁碑書良匠此云息懍是石
工之子而能大書深刻足可傳矣武氏石闕銘有
石工孟季季弟卯造此闕華山碑有郭香察書古
人不肯苟於其事如此

書居憂例

漢安平相孫根碑遭公夫人憂

漢涼州刺史魏元丕碑遭泰夫人憂

按孫君父爲司空故書公夫人泰卽太字漢制惟
列侯母稱太夫人此借稱以尊之也昌黎孟貞曜
墓誌稱尊夫人

書賜弔贈官賜諡例

漢太尉劉寬碑天子閔悼惻怛內發手筆爲策闕涕
咨嗟使右中郎將張良持節臨弔贈車騎將軍印綬

位特進賜含贈襚有加典禮復使五官中郎將何夔
持節諡曰昭烈侯

按漢碑皆稱君此碑文內稱公者以劉君爲三公
舉其官也鼂錯父呼錯爲公亦呼其官耳後世遂
爲年老及有爵之通稱矣

碑題書郡邑例

漢光祿勳東平無鹽劉府君碑

隸釋云漢人銘墓以郡邑題其首者所見唯此一
碑

書私謚例

漢司隸校尉魯峻碑於是門生汝南于闕沛國丁直
魏郡馬萌勃海呂圖任城吳盛陳留誠屯東郡夏侯
宏等三百廿人追惟在昔游夏之徒作謚宣尼君事
帝則忠臨民則惠乃昭告神明謚君曰忠惠父

按此爲私謚書碑之始

漢元儒先生婁壽碑國人乃相與論愆處謚刻石作
銘

按唐韓昌黎銘孟郊書貞曜柳子厚表陸先生書

文通皆用此例隸釋以爲羣下私相謚非古也未
流之弊故更相標榜其論甚正

碑題官位例

漢車騎將軍馮緄碑一要金紫十二銀艾七墨綬

此總計其所歷之官也隸釋云緄終於廷尉而以
將軍題碑者重金紫也

漢司徒掾梁休碑辟司徒府秉忠蹈絜又勞滿奏上
拜新都令

隸續云梁君終於邑宰而以公府掾書其額者重

內也

按漢人碑題官位或舉其大或稱內官後世如昌
黎爲權文公神道碑題稱故相權之卒時已罷相
矣後漢許慎本傳稱爲涑長而其子上說文表稱
故太尉南閣祭酒此官范史不載未審其就辟與
涑長孰爲先後嘉慶五年杭州西湖立許叔重祠
欲書粟主而疑其官位後遂兩存之若準此例則
書公府官爲得矣

附書他人例

漢綏民校尉熊君碑故長沙茶陵長文春字季秋質
摻貞良慈仁汎愛治天官日度風角列宿明知聖術
在官修德民歌遺風春秋七十以道隕遷宗允不紀
故爲宣昭故桂陽陰山豫章闕長重安侯相杜暉字
慈明體質宏亮訖仁好道治易梁邱春秋公羊氏綜
覽百家無所不甄典歷三城居官清惠遺愛在民春
秋七十終族後闕故因顯德以示來允

按隸釋云似是同郡盛德之士作文者惜其無紀
錄故附之左方也愚謂此必熊君之故交同官故

附著之若柳子厚亾友獨孤君碣先侍御石表碑
陰之類也至王介甫處士微君墓表王止仲謂敘
德履而并其同志之友二人者敘之則正如洪氏
所言表微闡幽之義也

一碑二人作例

漢張公神碑朝歌長鄭彬立左右闕表神道樹碑廟
堂之前銘勒神懿光秘後昆其辭曰云云後又云監
黎陽塋謁者李君畏敬公靈好鄭長文徹奉佐工悃
幅殷勤作歌九章頌公德芳其辭曰云云

按此張公不知何神鄭長既爲立碑作銘而謁者
李君好鄭之文又作歌九章共刻於碑此亦一例
也後世誌銘有序與銘各一人者祖此也

頌後有序有亂有詩例

漢司隸校尉楊孟文石門頌四言有韻後有序亦四
言有韻凡六句又漢都鄉孝子嚴奉碑有頌又有亂
曰云云

隸續曰其碑有文有頌又有亂曰十六句又有數
行載邑官甄表之因又漢李翁郝閣頌乃作頌曰

皆四言頌末云乃詠新詩下復有詩如騷體皆變
例也又按北海相景君銘乃作誄曰云云後復有
爵曰云云隸釋云爵者亂省其乙也則墓銘亦有
此例矣至校官碑先稱誄而後乃稱序體例倒置
未可以爲法也

墓碑有亂例

漢巴郡太守樊敏碑其辭曰云云又有亂曰云云
此與嚴舉碑同例又廣漢屬國侯夫人碑有嘆曰
書助葬人例

漢堂邑令費鳳碑故吏故鄣施業字世堅義民堂邑
儼忠隸釋云誅之後載施業儼忠二人竭力送終之
事業者鄣土之故吏忠者堂邑之義民皆費君之舊
部也初敘儼忠早畧慈考母服未除有廣陵之役聞
訃來奔祖載還鄉及泉隧有期復截經杖扶號柩棺
列種竒木建三磐石此其大畧也

按碑陰亦載兄弟甥舅諸姑伯姊夫人孝孫悲傷
哀痛之意宛轉淒切昌黎椰子厚墓誌書舅弟盧
遵亦此例也

壽藏銘例

漢梁相孔耽神祠碑年逾皓首縣車家巷黃髮充

不即

字老背有胎表孫息敖姚驩樂壽考觀金石之消知

萬物有終始圖千載之洪慮定吉兆於天府目覩工

匠之所營心欣悅於所處云云末有小字數十文曰

子得述父臣得錄君故紀焉時君年七十二自所立

作君子颯作內至

疑有脫誤

時已更郡諸曹史督郵承詔

紀行手自注石治師同縣朱遶朱祖并作畜部

隸釋云孔君自作壽藏而厥子刊石也按趙岐嘗

自作圓石而書其辭皆後人生壙自誌之始也

書童子例

漢童子逢盛碑童子諱盛字伯彌薄令之元孫遂成君之曾孫安平君之孫五官掾之長子也

按碑稱童子年十有二又云慈父悼傷割哀回鯉於是門生東武孫理下密王升等感激三成一列共義故共刊石敘述卞美以銘不朽蓋其父之門生爲立石者童子書字以成人禮之也此一例也後韓柳女孥下殤女子銘記皆自爲之辭其體例

漸廣矣

書故民例

漢故民吳仲山碑隸釋云漢之仕者沒有遺愛其州縣之民爲之采石鑿銘則自稱曰故民吳公匿迹韜光不答聘召作碑者體其謙晦之操故以民稱之故民者物故之民也

按後世如重其人之字則以字稱之椰子厚尹師魯墓誌之類是也從人所尊如貞曜先生徂徠先生墓誌是也有官位而不足以爲其人之重則不

書者處士侯君孔處士墓誌之類是也墓銘舉例
論之甚詳而其例寔放於此

書遷葬例

北魏司馬元興墓誌銘以永平四年歲次辛卯十月
癸亥朔十一日癸酉遷葬在溫城西北廿里記之

按元興卒於太和十七年相距已十九年矣其誌
畧不及其事迹有銘辭而無銘曰之文皆與他碑
異抑或先已有志懼再告也其紀遷葬之年月日
甚備此正例也

婦人碑誌書夫官位及姓氏例

晉任城太守夫人孫氏之碑

按漢氏婦人有碑誌者絕少侯成馬江二碑中及
夫人者皆以耐葬故夏堪碑亦然洪氏所錄惟司
農劉夫人碑其額已闕廣漢屬國侯夫人碑以中
有臧侯苗焉之文始知其姓兩碑文之首皆以夫
之官位系之其題額而署姓氏者實始於此漢兩
碑文皆古簡此碑序其爲女時勸父辭婚爲父所
異爲婦而舅姑嘉其淑婉娣姒宗其德音沒而二

子追懷罔極刻石爲辭蓋已漸就繇繹矣至北魏
司馬景和妻墓誌銘其前書魏代揚州長史南梁
郡太守宜陽子司馬景和妻墓誌銘則書其夫之
官位并其姓名而書之矣然妻之姓氏則見於文
內而首行不著至唐人則夫之官位姓氏與其妻
之姓氏皆列於首行如昌黎監察御史元君妻京
兆韋氏夫人墓誌銘之類甚多若椰子厚爲王叔
文母墓誌而以子之官位係之尤爲無法不可爲
典要矣

婦人墓誌以夫姓冠氏上例

周庾信周大將軍隴東郡公侯莫陳君夫人竇氏墓誌銘後魏驃騎將軍荊州刺史賀拔夫人元氏墓誌銘周大都督陽林伯長孫夫人羅氏墓誌銘

按子山諸誌皆以夫姓冠其氏又有譙國公夫人步陸孤氏趙國公夫人紇豆陵氏安昌公夫人鄭氏諸文其標題不書姓者以有封號或作配宗室也

諸王不書姓例

梁沈約齊故安陸昭王碑文公諱緬字景業

按王止仲墓銘舉例有宗室不書姓例本此

誄序用韻不用韻例

魏曹植王仲宣誄晉潘岳楊荊州誄宋謝莊孝武貴妃誄序皆有韻潘岳夏常侍誄馬汧督誄宋顏延之陽給事誄陶徵士誄序皆無韻

按漢人銘墓之文亦曰誄是誄與誌銘相通也其序如誌辭如銘若意主於詞則序可簡而用韻王仲宣誄之類是也若欲敘次其功績行義必繁幅

乃能盡者其序用韻則不能委曲達意馬督陶徵
士之類是也此無定例可以意得之漢人頌功德
之碑其辭曰之前亦多有韻者古人文簡故也

穿中有記例

隸釋有張賓公妻穿中二柱文洪云亦埋銘之椎輪
按詳其文有於穿中造內棲柱作崖棺則柱爲寘
棺之用而因刻石以記之椰子厚爲其女兒墓志
書於蓋石亦此意也近鮪埼亭集文屢用穿中字

碑前列上書制詔例

漢孔廟置守廟百石孔和碑

魯相史晨孔廟碑

宏農太守樊毅復華下民租碑

無極山碑

按此四碑孔和碑凡有三式三公奏天子一也朝廷下郡國二也郡國上朝廷三也隸釋謂可以見漢代文書之式者其碑建於永興元年其奏事及詔皆在元嘉三年末後有讚曰云云史晨碑止載建寧二年三月魯相臣晨長史臣謙上尙書云云

無詔末後卽銘其饗孔廟後碑曰欽因春饗導物
嘉會述修辟雍社稷品制卽上尙書參以符驗乃
敢奉祀餘胙賦賜刊石勒銘并列本奏則序其得
請之後饗廟之禮也樊毅碑亦止載光和二年十
二月宏農太守臣毅上尙書云云末後一行云宏
農太守上祠西嶽乞縣賦發差復畢下十里以內
民租田口算然亦無制可之文其修畢嶽碑乃有
上奏復賦克厭帝心之語無極山碑載光和四年
太常臣耽丞敏上尙書云云制曰可其書到言以

下有南陽馮府君於是言太常奏可其年八月丁丑詔書聽其九月更造神廟恢拓祠宮乃立碑銘德頌山之神焉云云前列書詔後述建立敘次周悉爲碑文正例東坡表忠觀碑正合此例

碑後列制詔例

漢中常侍樊安碑制詔中常侍樊安宿衛歷年恭恪淑慎嬰被疾病不幸蚤終今使湖陽邑長劉摻追號安爲騎都尉贈印綬魂而有靈嘉其寵榮烏乎哀哉延熹元年八月廿四日丁酉下

按此在墓碑之後殆追刻也潘岳馬汧督誅亦載
贈官制詔則悲其被誣而獲申耳

應詔作銘書年月例

梁陸倕石闕銘於是歲次天紀月旅太簇皇帝御天
下之七載也下云爰命下臣式銘盤石新刻漏銘上
云歲纏闍茂月次姑洗皇帝有天下之五載也下云
天監六年太歲丁亥十月丁亥朔十六日壬寅漏成
進御下云乃詔小臣爲其銘曰

按石闕卽是年所立漏刻造於五年成於六年故

兩書年月也

書奉敕例

後周華嶽頌末二行使持節驃騎大將軍開府儀同
三司大都督司宗治內史臨淄縣開國公万紐于瑾
造此文車騎大將軍儀同三司縣伯大夫趙興郡守
白石縣開國男南陽趙文淵字德本奉敕書

按此後周天和二年所立文與書竝列其名唐瑾
作頌文中已有乃詔史臣語故止書名者著奉敕
也其兼書字者與陸希道銘同奉敕之名始見於

此亭林以爲撰人書人列名始此則非也

· 書作文變例

東魏太公呂望表末行通直散騎常侍聘梁使平東
將軍中書侍郎恒州大中正修左史汲郡太守穆子
容山行之文

按此旣著其名又著其字不曰撰而曰某之文皆
變例也又先刻盧無忌舊文於前而後書作碑之
故亦後來第二碑之所放也

隴東王感孝頌時開府中兵參軍梁恭之盛工篆隸

騎兵參軍申嗣邕微學摘藻並應命旨俱營頌筆

按此作文書碑之人俱序於文中不更列名亦變

例

紀功碑書其人三代例

漢曹全碑君諱全字景完敦煌效穀人也高祖父敏
舉孝廉武威長史巴郡胸忍令張掖居廷都尉曾祖
父述孝廉謁者金城長史夏陽令蜀郡西部都尉祖
父鳳孝廉張掖屬國都尉丞右扶風隃麋侯相金城
西部都尉北地太守父蟬少貫名州郡不幸早世是

以位不副德

按此是曹君門下掾部功曹等所立紀功者而書其高曾祖父綦詳亦漢碑中所少見生存而曰諱則當時往往如此其序征和德爲戊部司馬又足以證劉攽無已字之確也

金石例補終

人嘗有言天下文日綦而道日岐也蓋士習之靡久
矣選懦而庸下者鮮知所樹立囂囂然其高自命者
亦知談漢唐以來之學也求其故則亦今之所爲漢
唐之學而已耳元季潘子深慨夫末俗之染人故立
一程一以韓愈氏爲宗最後王黃兩家踵之闡其道
今吳江郭祥伯實祖潘子之悒於規畫步驟悉鈇抉
之綴爲例將使後之有志於漢唐之學者不以是非
非是冒取不信於人人且不致易尊其說而舍售其
私也吾所以擴三例以編之亦曰此數百年斯文之

系爾審於是可勿嗟文辭之亦曰此燬百卒祺文之
特異冒瑕不詳然人人且不姪愚尊其錯而舍善其
之也雖爲同類對翁之亦志於萬事之學者不以是非
今吳王將鞭而實斷斷于之計於賦畫志懸衆驗共
一跡一以韓愈丹爲宗景翁王黃兩家觀之闡其首
書文學而曰耳示季番于彩卿夫末俗之樂人姑立
亦快猶萬書以來之學出求其始傾亦今之祖爲萬
矣歎謝而亂不昔猶也然樹立囂囂然其高自命者
人谷亦言天下文日慕而數日勉也蓋士習之變人



温州市图书馆

WENZHOU LIBRARY



温州市图书馆

WENZHOU LIBRARY